

新纂雲南通志

第十函
第十冊



新纂雲南通志卷一百六十二目錄

邊裔考一

邊防

大理府

永昌府

順寧府

附鎮邊廳

普洱府

附元江直隸州

臨安府

開化府

廣南府

新纂雲南通志卷一百六十二

邊裔考一

雲南位處邊陲爲西南國防前衝安南緬甸壤土相接暹羅國境亦復相近道光志有邊防圖及邊裔一門光緒兩志因之用意至善茲本其意合邊防四裔彙爲茲考蓋以其關係國家前途至巨願國人勿加忽視則鑒往以知來亡羊而補牢未爲晚也

邊防

光緒續志以道光志因杜氏通典之例創爲麗江雲龍永昌順寧思茅臨安開化廣南邊防八圖迄於清末永昌之八關半淪於外順寧之南境分設鎮邊廳寧洱之猛烏烏得兩土司臨安之三猛割與法人且立約許開鐵路入腹地則事勢已異於疇昔麗江接壤西康不

爲邊地茲采清史稿所述並錄前志及有關者紀載

參閱土司考及外交考

惟鎮邊

改附於順寧而刪麗江並別爲元江普洱臨開廣三府對汛各圖當時形勢如此雖爲往跡亦資考證至於今日以道路之開闢工具之進步交通發達迥異以前與前此之邊防相較又不可同日而語矣雲南沿邊環接外夷南境之蒙自當越南國西南境之騰越當緬甸國尤爲南維鎖鑰騰越界連野番舊設八關九隘以土練駐防緬甸國入貢之道向由虎踞關入經孟卯隴川等處以達南甸設南營都司以備之自外海輪舶南來直抵新街商賈咸趨北道由騰城西南行經南甸干崖蓋達三宣撫司歷四程而至蠻允過此即野人境其間有三路下爲河邊路中爲石梯路上爲炎山路下路較近上路則柴草咸便行四日至蠻暮入緬甸界舟行一日可達新街又印度東

境之野山係貉獠番族英吉利人由印度侵入闢地種茶桑其地可通孟養而達騰越邊外強鄰野俗錯處可虞明代舊置銅壁巨石萬仞諸關以固邊圉水道則海珀江自干崖以下水勢漸寬與大金沙江合流元代征緬甸以舟師制勝取建瓴之勢也其永昌順寧大理三府皆迤西邊界山深箐密漢夷雜處清初原設永順鎮總兵迨改鎮爲協僅於永昌城駐兵沿邊一帶有鞭長莫及之虞雍正二年青海平定於鴉龍江各處設副將等官宗鄯地方當雲南孔道設參將等官以靖邊服三年因威遠大山爲苗倮盤踞之所乃於普茶山各處設參將等官兵丁千二百人並於九龍江口設立防汛四年以四川阿墩子地方當中甸門戶移其防汛歸雲南省管轄與裏塘打箭爐相爲犄角五年以中甸延袤千里爲滇省西南藩籬維西乃通西

藏要隘增設參將營於中甸守備營於維西六年因烏蒙鎮雄二處地方遼闊於烏蒙設總兵等官鎮雄設參將等官分隘駐防所有舊設之貴州威寧營雲南鎮雄營東川營咸隸烏蒙鎮總兵調遣建築城垣旋增兵千五百人設尋甸州參將等官七年設普洱府及普洱鎮將標兵三千二百人分防各路乾隆三十二年以木邦爲通緬甸要路並九龍江隴川黑山門各隘咸以兵駐守四十三年李侍堯因永昌普洱等府向以鎮協標千五百人在三台山龍江一帶駐營防緬冬去春回頗形煩累永昌府控制全邊重在騰越其南甸之東南爲杉木籠距虎踞關百餘里當騰越左臂南甸之西南爲干崖距銅壁萬仞神護巨石諸關均一二百里實爲各路咽喉乃於杉木籠干崖二處各參增弁營汛龍陵地方道通木邦原駐兵千五百人其南

三台山尤爲扼要亦設增弁兵以順寧一路舊有之額兵分駐緬寧與永順右營協同防守總督提鎮大員每年酌赴騰越邊外巡閱一周以期嚴密嘉慶十七年以雲南邊外野夷僱匪肆擾而緬寧騰越各隘皆瘴癘之地難駐官兵復設土練兵一千六百人以八百人駐守緬寧之丙野山梁等處八百人駐守騰越之蠻章山等處省官兵征調之勞道光間林則徐於迤西移改協營增設弁兵其扼要之處爲永平縣永昌府龍街汛永定汛漾濞汛姚關汛等凡二十一汛咸增兵駐防而瀾滄江橋尤爲扼險順寧府毗連夷地以龍陵協與順寧參將對調緬寧廳錫臘右甸阿魯史塘等處防軍或分汛多而存城少或分汛少而存城多地之夷險與兵之多少不均咸酌量增調大理府原駐提督而上下二關及太和縣城彌渡紅岩趙州等處尙

屬空虛均增兵填防姚州蒙化二處亦改汛增兵同治間雲南平定
岑毓英因迤西麗江府城池地處極邊界連西藏麗江劍川交界之
喇雞鳴地方係江邊要隘江外即野人境向未設兵乃以麗鶴鎮都
司移駐麗江府劍川營都司移駐喇雞鳴此外楚雄府屬之八哨地
方三四百里間僦夷雜居亦係要地令楚雄協副將設汛駐兵十三
年以昭通標兵之半赴金沙江外駐守光緒七年劉長佑因劍川城
地當孔道爲迤西要區以喇井營移駐劍川喇井亦瀾滄江要地以
吉尾汛移駐互相會哨十年岑毓英因滇省入越南之路以馬白關
爲要法蘭西人通商之路以蒙自縣爲衝沿邊千里處處錯壤留防
之兵一萬六千人編爲三十營以馬白關隸開化鎮總兵蒙自隸臨
元鎮總兵每年瘴消之際親赴邊陲簡閱營伍箇舊錫廠規制宏大

廠丁數萬人漢夷雜處且通三猛蠻耗各路乃增設同知一員移臨
元之都司營兵駐防箇舊調原駐開化游擊移守馬白關以右營都
司分防古林移右營守備駐長嶺岡以臨元游擊駐蒙自縣右營都
司分防水田右營守備分防嵩田爲因地制宜之計自雲南入緬甸
共有六途以蠻允一途爲捷徑沿邊由西而南而東皆野人山寨布
列於九隘之外兵團守望時虞不足乃調關外勁旅二千餘人與原
有防軍及鄉團土司協力警備十四年岑毓英以邊境倮黑夷匪頻
年滋事分別勦撫倮黑所屯踞之地分上下改心在瀾滄江畔界接
土司其東西大路與緬甸逼處爲順寧普洱兩府屏蔽其下改心地
方尤爲扼要乃增設鎮邊撫夷廳擇地建築城垣並設參將等官駐
防兵丁一千一百五十八人二十二年鹿傳霖以維西協所屬阿墩

子汎地界接川邊之巴塘左臨瀾滄江右扼金沙江地勢至要英緬鐵路所經相距漸近僅四五日程乃協商四川疆臣酌設重鎮並於川滇交界處兩省各設文武員弁協力防邊雲南自英據緬甸法奪越南防守兩難光緒之季西南騰越臨安兩路創設團練稍資捍衛而餉絀兵單邊防漸弛矣

清史稿

大理府

越禮城在永昌北管長傍藤彎長傍城三面高山臨祿旱江藤彎城南至摩些樂城西南有羅君尋城又西至利城渡水郎陽川直南過山至押西城又南至首外川又西至芒部落又西至鹽井又西至拔熬河麗水城尋傳大川城在水東從上郎平北里眉羅苴鹽井又至西安城直北至小婆羅門國東有寶山城又西渡麗水至金寶城眉

羅苴西南有金生城從金寶城北牟郎城渡麗水至金寶城從金寶城西至道吉川東北至門波城西北至廣蕩城接吐蕃界北對雪山所管部落與鎮西城同鎮西城南至蒼望城臨麗水東北至彌城西北至麗水渡麗水渡面南至祁鮮山山西有神龍河柵祁鮮以西即裸形蠻也管摩零都督城在山上自尋傳祁鮮以往悉有瘴毒地平如砥冬草木不枯日從草際沒諸城鎮官懼瘴癘或越在他處不親視事南詔特於摩零山上築城置腹心理尋傳長傍摩零金彌城等五道事云凡管金齒漆齒繡腳繡面雕題僧耆等十餘部落

樊綽蠻書

按祿

旱江郎潞江亦曰麗水蠻書所言諸城今皆不可考大率在雲龍以西及永昌以西今怒夷栗粟緬甸孟養諸處存之以備參考云

光緒志

乾隆十二年州屬秤戛夷人弄更扒係土巡檢段連第屬下熟栗粟

按雲龍江外栗菜一名力些一名赤髮野人有生熟二種熟者耕種生者搶劫爲生

劫掠潞江芒市等土司地方又騰越邊外官寨

夷人早可亦係雲龍土目段連第屬下熟栗栗劫掠段連第所管片馬魚洞二寨經官兵擒勦定江東之六庫渡口趕馬撒魯威水井烏木郎老窩雞嘴鵝毛頂魯巖六藏五地施底魁梧觀板塲漕澗江西之片馬魚洞秤戛臘白烏別響習得烏地細危羅姑密登大竹羅大竹地竝歸雲龍州管轄江西之姑密登細危羅大竹羅大竹地秤戛臘白烏別響習得烏地江東之老窩雞嘴鵝毛頂魯巖六藏五地施底魁梧觀板塲歸段維精管理江東之六庫渡口趕馬撒魯威水井烏木郎歸段復健管理江東之漕澗與保山孫足等處歸左世英管理亦屬雲龍管轄江西之片馬魚洞二寨歸段連第管理移住登埂

屬騰越州管轄段復健段維精授土千總左世英授土把總

光緒志

光緒二十三年據雲龍州覆稱州西界舊轄土司三處漕澗左氏久經故絕所轄漕澗孫足兩地由地方官管理六庫土司段氏見所管村寨曰六庫曰渡口曰趕馬撒曰魯威曰水井曰烏木郎共七村其疆界西止潞江對岸爲保山登埂土司界登埂卯照魯掌練地四土弁在騰越馬面關東北相距二三十里由馬面西行三十餘里即明光隘明光之北爲大塘隘南爲滇灘隘三隘俱通昔董相距不過八九十里所謂蓋西一路是也近年昔董已爲英人駐以重兵由昔董南行二百九十里即抵騰越廳城若自昔董東趨由明光馬面而抵卯照登埂則雲龍之六庫當其衝老窩土司段維精之後所管村寨其可知者潞東曰老窩曰魯奎曰雞嘴曰鵝毛頂曰魯巖盧曰藏瓦底曰瓦底曰央邊曰板廠曰龍潭曰魁梧觀潞西曰秤戛曰喇本曰

烏別曰姑密登曰響習曰得烏地曰勒底曰昔維羅曰大竹羅曰大竹地而地無定名村落遷徙無定在不可得詳以與舊志相較已多不同蓋憑夷語以定村名而語音之輕重變異字即隨之爰就檔案

詳錄俾後有所參考云

光緒續志

附雲龍州邊防圖於後

永昌府

萬曆二十三年十二月巡撫陳用賓建築關堡並屯田以備緬緬知
關堡之不利數撓我興作用賓修文告遣閩人黃襲使暹羅使與得
楞內外夾攻緬二十四年二月築半麓城於猛卯大興屯田先是邊
事旁午緬費不訾即轉輸米石運價至十金而直不與焉編氓鬻妻
子諸郡邑不支故用賓銳意興屯然三宣之內田無多初議以營兵
任屯非營兵而願屯者亦聽鉉基取之汰兵之羨餉又以餉直充糴
計石銀七錢秋成照直入廩計納公田一斗二年小成免其什一之
賦三年大成始什一而賦之然以瘴惡屯者不能耕西偏諸兵糜公
帑如故

包見捷
緬略

銅壁關設於布嶺蠻哈山內南甸宣撫司地控制蠻哈海黑蠻暮要

地萬仞關設於蓋達山後猛弄山頂控制港得港勒迤西等要路神
護關設於蓋西後猛戛山控制茶山古勇威緬迤西等路巨石關設
於戶岡息馬山控制戶岡迤西要路鐵壁關設於等練山控制蠻暮
水路虎踞關設於邦杭山控制蠻棍遮輦先腦猛密要路天馬關設
於邦欠山控制猛廣猛密猛曲等處要路漢龍關設於工回

騰越
州志

前明萬曆間雲南巡撫陳用賓設八關以禦緬銅壁萬仞神護巨石
爲上四關鐵壁虎踞天馬漢龍爲下四關乾隆以後漢龍關淪入木
邦道光以後鐵壁虎踞天馬三關亦失所在光緒十一年英人滅緬
欲與我劃定疆界十九年督撫委員率土司會英員查勘下四關處
所據稟自隴川章鳳街西北行至洗帕河內麻湯猛董查得猛董地
方有鐵壁英雄四字碑石一塊該關或即此地又自章鳳街西行入

盆干至虎踞該關基址尙存關旁亦有碑石字已剝蝕又由盆干南行經理馬至幸布該處有大石一箇高一丈二尺石旁即走礦洞大路漢夷野人僉稱從前以路爲界又由章鳳西南行至天馬關基址尙存關在南坎河外英人已在天馬關內修有大路至漢龍在南坎之西南於關址中掘得龍關二字各半殘石額二塊其地在礦卯山關之石門猶存由南坎西南行逾龍川江至天馬關共九十里由南坎西南行至漢龍關共三十里此四關皆騰越西南緊要門戶荆榛塞路久無人行虎踞鐵壁兩關在隴川之西逼近新街天馬在猛卯西漢龍在猛卯西南兩關並峙中隔龍川江十九年查勘情形如此二十四年與英人劃界又勘明鐵壁關在洗帕河內瓦蘭嶺山下基址猶存從前撫彝以隔隴川遠瘴癘重私退駐板凳山移鐵壁英雄